

摘藻堂四庫全書薈要

集部

欽定四庫全書薈要

集部

劔南詩藁卷四十六

七

詳校官助教臣謝登雋



欽定四庫全書薈要卷一萬五千五百二十六

集部

劍南詩藁卷四十六

宋 陸游 撰

孟夏方渴雨忽暴熱雨遂大作

蒸溽殊未解雨來那可涯鵲驚無穩樹燈暗不成花處
處躍秧馬家家閒水車兒童伴翁喜聚首話桑麻

小池

荷鋪庭中破嫩苔清溝一派引泉來剪刀草長浮萍合

無數遊魚去復回

衡門

曲徑衡門短短籬
槐楸陰裏倚筇枝
老來百事不入眼
惟愛青山如舊時

海上作

厭逐紛紛兒女曹
挂帆江海寄吾豪
鯨吞鼉作潭閒事
要看秋濤天際高

朝饑示子聿

水雲深處小茅茨雷動空腸慣忍饑外物不移方是學
俗人猶愛未為詩生逢昭代雖虛過死見先親幸有辭
八十到頭終強項欲將衣鉢付吾兒

養氣

養氣安心不計年未嘗一念住愁邊才疎屢掃朝中迹
命薄翻成世外緣耐老尚能消劫石放狂聊復醉江天
飽知句曲羅浮路不訪初平即稚川

示友

黃卷青燈自幼童長年頗亦有新功尚嘲孟顓遲成佛
那計辛毗不作公學問更當窮廣大友朋誰與共磨礪
諸君果未捐衰老鄙語人當致一通

早涼熟睡

靈臺虛湛氣和平投枕遂巡夢即成屋角鳴禽呼不覺
手中書冊墮無聲百年日月飛雙轂千古山河戰一枰
賴有蓮峰遺老在白雲深處主齊盟

謂陳希夷

初夏

麥禿微寒後梅黃細雨前湖灘初集鷺堤柳未鳴蟬琴
帶輕陰潤巾因小醉偏晚來幽興極又上釣魚船

夏雨

忽聞疎雨滴林梢起看油雲滿四郊行蟻君臣初徙穴
鳴鳩夫婦正爭巢築陂處處移新稻桑屋家家補破茆
堪笑此翁惟美睡孝先便腹任譏嘲

倚樓

千里江山入倚樓高吟聊復寫吾憂詩書幸有先人業

貧賤初非學者羞數掩槿籬端可老一杯藜粥尚何求
東陂未插青秧遍且與隣翁卜雨鳩

晚興

偶扶藜杖過傍村却倚禪牀坐小軒日落鴉栖津樹暗
人歸鶴踏釣船翻挽弓從笑識丁字刺繡終勝倚市門
羹芋一杯吾自飽諸兒強為置盤飧

是日五郎等
置食參倚

又

身如病鶴謝樊籠白盡衰髯臉尚紅蒲葦陂塘新漲後

梧楸門巷夕陽中遺名要耐千年看快飲方誇百榼空
造物閔憐君會否放教折臂老新豐

晨雨

過雲生谷暗既雨却窗明低燕爭泥語浮魚逆水行山
川增秀色草木有奇聲處處青秧滿長歌樂太平

戲作絕句以唐人句終之

雨細穿梅塢風和上柳橋山居無歷日今日是何朝

又

靜對煎茶竈閒疏洗藥泉回頭問童子今夕是何年

述懷

情懷猶是昔年人豈料侵尋八十身燈下看書方覺老
花前闕酒始知貧玉非鼠扑何勞辨魚與熊蹯各自珍
萬事回頭已陳迹為君一笑落紗巾

閒中自詠

鶴羨清癯鷗羨閒衡門正在水雲間無求尚恨時賒酒
有癖應緣酷愛山細繞坡頭行犖角別分泉脉聽淙潺

三更不睡看江月恐有高人夜叩關

晨興

小雨過郊墟晨興一事無殘榴重結藥新燕續生雛書
細猶能讀行遲漸要扶蔬畦恐蕪沒且復課僮奴

自詒

愈老愈知生有涯此時一念不容差身如病鶴長停料
心似山僧已棄家高枕時時聞解籜卷簾片片數飛花
飯餘解帶摩便腹自取風爐煮晚茶

又

行年耄及臥蝸廬山水登臨亦已疎無可奈何猶食粟
未能免俗學澆䟽蓬門時接漁樵話塵几聊存種樹書
強欲入城還自笑世間那有鶴乘車

西村

亂山深處小桃源往歲求漿憶叩門高柳簇橋初轉馬
數家臨水自成村茂林風送幽禽語壞壁苔侵醉墨痕
一首清詩記今夕細雲新月耿黃昏

漁父

楚江茫茫新雨霽殘雲蹙作魚鱗細老翁短楫去若飛
我欲從之已天際從之不可況共語醉眼知渠輕一世
直鉤去餌五十年此意寧為得魚計

放歌行

少年不知老境惡意謂長如少年樂朝歌夜舞狂不休
逢人欲覓長生藥三二十年底難過屈指朋儕餘幾個
就令未死身日衰朱顏已去誰能那人間萬事如奕碁

我亦曾經少壯時兒曹紛紛不須校歲月推遷渠自知

苦貧

老作清時版籍民深耕迨及故山春熟思豈是天貧我
妄計還憂鬼笑人但使甑中餘麥飯何妨澗底采荆薪
此窮正坐清狂爾莫向瞿曇問宿因

晨起至參倚齋示子聿

似仙猶火食比古未巢居老子麤全節小兒能著書下
簾留乳燕投飯出潛魚幸好隆中客無為起草廬

夏夜對月

薄雲歸欲盡殘雨久猶滴月入疎林間庭戶粲珠璧梅
天苦蒸鬱爽氣始此夕豈無一舴艋放浪江天碧散髮
黃鶴樓醉弄白玉笛真當舞魚龍詎止裂金石

夏夜

酒力初消睡未厭臥看香縷繞疎簾月高棲鵲重移樹
風勁流螢自入簷長夏迢迢秋尚遠孤愁冉冉病相兼
老人本是山中客掃迹元非畏楚鉗

五月十日曉寒甚聞布穀鳴有感

弊袴久當脫短褐竟未送

吳中諺語曰未喫端午粽布襖未可送俗謂典質曰送

老怯五更寒重衾擁殘夢羣蟲方得意飽血藏衣縫竹
簾何時陳紈扇殆無用長夏疊疊來歲月疾飛輕妄懷
畎畝憂太息欲誰控

老歎

人生易衰老萬事海濤翻但恨芳尊近寧悲雪鬢繁諸
儒輕古學故土隔中原有語誰能聽毋矜舌尚存

閉戶

收身歸死鏡湖傍
閉戶悠悠白日長
巷僻斷非容駟路
腸枯那有蹴蔬羊
書生正可蹈東海
世事漫思移太行
睡起不知天早暮
坐看螢度篆盤香

長饑

病臥窮閭負聖時
本來吾道合長饑
朝不及夕未妨樂
死何如生行自知
早年羞學仗下馬
末路幸似泥中龜
烟波一葉會當逝
吹笛高人有素期

山齋書事

山榴子結又重開
巢燕雛飛却續回

燕有三生雛乃去者

雨足人

畦千頃稻日長風舞一庭槐
浩歌縱酒愁仍在作意觀
書睡已來常恨流年不相貸
若為更著莫蟬催

贈道流

賣藥會稽市不知今幾年
身常雜庸保世果有神仙醉
帽簪花舞漁舟聽雨眠
放翁獨識子肯向俗人傳

避暑松竹間

雙松五丈高萬竹一尺圍上有林蟬鳴下有礧鳥飛正
午不見日我來每忘歸清詩忽陳前永與世俗違直北
有異境烟汀連釣磯何當霜雪時散髮櫛葉衣

連日大雨門外湖水渺然

赴朝把笏著烏鞞不似歸來買短蓑尚鄙朱公養魚術
肯為甯戚飯牛歌逢時有命求何益觸事無心得最多
樂處却嫌兒輩覺出門十步即烟波

午睡

槐楸陰裏綠窗開
天與先生作睡媒
流汗未乾衣上雨
大聲已發鼻端雷
枕鐫松石分琴薦
簾織風漪取笛材
却起岸巾看汲井
人間車馬正氛埃

窮居

阮窮心自樂
寂寞道常尊
老病頻辭客
嬉遊不出村
淖糜均列鼎
徒步當華軒
不但終吾世
猶堪遺子孫

梅雨

殘雨收還滴
低雲去復留
護雛憐弱燕
喚婦笑鳴鳩
碓

米舂初滑園蔬摘復抽誰知泥沒踝也有客相求

村居書事

困厄難希飽煖家未妨隨事作生涯白鹽赤米已過足
早韭晚菘猶恐奢鴨放競浮新漲水牛歸正及暝棲鷄
年逾七十方辭祿敢望高人挂齒牙

閒中信事二首其一追和陳去非韻其一追和王
履道韻

我看浮名如脫髮誓墓收身老巖穴座延窮鬼心不疑

鑪錘橫財渠自別樂哉今為八十翁神交園綺商山中
烹葵剝棗及時序爛醉黍酒歌邠風

又

小江之上千峰立潮回艇子爭來集飄風忽起白浪高
急雨橫吹綠蓑濕歲豐斗酒纔百錢茆店無人驚醉眠
醒來徑入亂雲去異日出看東封年

題齋壁

鏡水西頭破茅屋紹興初載舊書生門無車馬終年靜

身臥雲山萬事輕
三釜昔傷貧
藉祿一塵今幸老
為氓斷蓬不是無
飛處莫與飄風抵死爭

夏日雜題

疎疎窗似秋蛩室
疊疊書如春鵲巢
大耋何妨尚絃誦
小詩時亦雜詼嘲

又

耿耿醜石巖當道
矯矯長松龍上天
滿地凌霄花不掃
我來六月聽鳴蟬

又

情懷萬里長征客身世連牀旦過僧熟計書空成咄咄
不如任運去騰騰

又

一枝黎峒枕榔杖二寸羊城螭蝟冠萬里來為老人壽
始知天地不勝寬

又

天隨手不去朱黃辟蠹芸編細細香今夕短檠須暫設

北窻風雨送微涼

又

身閒欲出無如嬾
酒薄雖傾不敵愁
殘暑從今無一月
剩儲詩思待新秋

又

憔悴衡門一秃翁
回頭無事不成空
可憐萬里平戎志
盡付蕭蕭暮雨中

又

衰疾沈綿短鬢疎淒涼圯上一編書中原久陷身垂老
付與囊中飽蠹魚

夏雨歎

蝸舍入門楣觸額黃泥壁作龜兆圻雨多潦水欲上堦
臥聽鳬鴨聲拍拍日高糴米奴未回坐知薄飯未容索
仕羞捷徑耕不力自取囊空欲誰責富貴危機復可畏
世間果無第一策雖然胸中有事在片言可壽天下脉

物外雜題

市墟沽斗酒獨酌復高歌一笑語觀者比君更事多

又

當年下沔鄂回首幾秋風景物渾如昨千帆落照中

又

曉入姑蘇市閭門繫短蓬老人元不食買餅飼山童

又

送客停山步尋僧立寺門青鞵慣泥潦却愛雨昏昏

又

粉堞臨江渚朱橋枕市樓長吟策小蹇又度一年秋

又

飼驢留野店買藥入山城興盡飄然去無人識姓名

又

高城今曠野比屋昔朱門道上傳呼過遙遙幾世孫

又

過市摩雙眼驚嗟閱盛衰朱樓倚霄漢曾見始成時

過村舍

碓舍臨山路牛欄隔草烟問今何歲月恐是結繩前

晝臥初起書事

歲華病思雨侵尋靜看槐楸轉午陰待睡不來聊小憩
煨詩未就且長吟還山久洗天涯恨謝事新諧物外心
忽有故人分祿米呼兒先議贖雷琴

夜雨有感

斷虹不隔江郊雨

東方虹見則雨止俗語謂之隔雨今歲獨不爾

一醺昏燈夜

半時多感生悲那為酒積衰成瘦錯冤詩空塔點滴何

由止倦枕淒涼只自知平日故人零落盡寄書誰與叙
睽離

偶作夜雨詩明日讀而自笑別賦一首

俗情向者未全忘洗以縈簾一縷香得失故應常浩浩
是非正可付蒼蒼殘蟬不斷知秋近雙燕歸來伴晝長
誰識龜堂新力量東家却笑接輿狂

舍西晚眺示子聿

秋濤常記犯靈胥季子雙髦尚髧如薄飯不為明日計

短檠相對十年餘，嗟予久合墮鬼錄。
憐汝猶能讀父書，西望牛頭渺天際。
永懷吾祖起家初，牛頭山在小江西，北有先太傅讀書堂尚存。

自訟

年少寧知道廢興，搏風變化羨鯤鵬。
貪求但欲攀分寸，痛定方慙乞斗升。
靈府已能澄似水，俗緣更覺薄于僧。
挂冠且喜身蕭散，二頃寧須退可憑。

讀唐人樂府戲擬思婦怨

一自門前征馬嘶此心常與斷雲西雙飛空羨雉朝雊
獨泣忍聞烏夜啼遼海晝昏塵漠漠杜陵春到草萋萋
孤愁可為隣姬說只有臨樽醉似泥

南堂納涼

環坐列胡牀兒曹共此涼風生桐葉墜露下稻花香老
幸返初服窮宜歸故鄉已無纓可濯清嘯對滄浪

又

浴罷閒無事悠然寄一牀水風涼醉頰松月上虛廊岸

久烏紗側熏餘細葛香今宵一美睡何止傲羲皇

中庭納涼

紅映衡門夕照明翠浮村巷暝烟生搖搖楸線風初緊
颭颭荷盤露欲傾數酌濁醪留客醉一編疑義與兒評
須臾散去人聲寂獨數城頭長短更

又

散髮江天嬾出遊衡門日落鎖梧楸火雲突兀方蒸暑
銀漢縱橫已報秋熠熠露螢黏徑草蓼蓼漏鼓下譙樓

追涼明日無奇策聊向林間卜雨鳩

待旦

東方星磊磊西舍雞喔喔萬慮集五更吾睡無由著
世事如餘酒不獻自無酢開窗起危坐送月西南落

又

是身如浮烟久聚要當散吾年七十七寒暑凡幾換
夏夜亦自佳何必厭揮汗推枕坐南窗悠然待清旦

晨興

冬夕宜晚睡夏日思晨興磊落明星高蒼涼朝日昇正襟坐堂上有几不敢憑陳前聖人書凜如蹈淵冰平生不苟利豈獨畏友朋長饑君勿謂人各有不能

又

欲曉不能寐亟起坐北堂齋莊對斷簡左右陳朱黃湛湛一池墨裊裊半篆香老生不自逸幸此夏日長奇哉長頭兒好勇不可當安得數年健與兒講虞唐

晚涼述懷

未學常憂墮客驕晚知鵬鷁本逍遙屏醫却藥疾良已
破械空囹盜自消父子終身美藜藿交遊大半是漁樵
衡門日落清風起又著藤冠度野橋

湖塘晚眺

綠樹暗村墟青山繞草廬奉祠神禹舊馳道暴秦餘浦
色沉烟網蛙聲入雨鉏清秋又如許幽憤若為摅

又

病起閒無事時來古渡頭烟中賣魚市月下采蓮舟帆

鼓娥江晚菱歌姥廟秋長吟無傑句聊以散吾愁

小集

烏柏遮山路紅蕖滿野塘病蘇身漸健秋近夜微涼杯
酌隨宜具漁歌盡意長兒曹娛老子團坐說豐穰

出門與鄰人笑談久之戲作

少時已歎少驩娛衰病經旬一笑無今日出門逢父老
欣然隨衆強盧胡

又

莫靄昏昏半掩扉偶逢鄰叟荷鋤歸且令閒說鄉村事
莫問渠言是與非

又

菽水欣欣每盡歡仁賢不必襲衣冠出門邂逅移時語
未害龜堂取友端

又

屋角時聞黃犢鳴相逢但可說春耕一言誤及城中事
議罰應須便酌觥

魚池將涸車水注之

清波溜溜入新渠鄰曲來觀樂有餘試手便同三日雨
滿陂已活十千魚喜如雷動風行際快若天開地闢初
萬物但令俱有託吾曹安取愛吾廬

一齒動搖已久然餘皆堅甚戲作

病齒元知不更全漂浮杌隤已三年一朝正使終辭去
大嚼猶能盡彘肩

晚至新塘

青鞵隨意出柴荆聊向南塘曳杖行歸鳥已從烟際沒
斷虹猶在柳梢明城頭層堦凌空立浦口孤舟竝岸橫
向道有詩渾不信為君擁鼻作吳聲

夜泛湖中

水鴨鷀鵲拍拍飛菰蒲深處弄烟霏喚回二十年前夢
半醉姑溪棹月歸

立秋後作

宋玉悲秋千載後詩人例有早秋詩老夫自笑心如石

三日秋風漫不知

覽鏡

此頭那可著貂蟬瘦似騎驢孟浩然一事比渠差省力
閉門無句與人傳

早秋南堂夜興

水注橫塘藻荇香候蟲唧唧滿空廊風前落葉紛可掃
天際疎星森有芒夜漏漸長愁少睡秋衣未製怯新涼
明朝却有欣然處寫得黃庭又幾行

菱歌

海內知心人漸少
眼前敗意事常多
問君底事渾忘却
月下菱舟一曲歌

聞角

河白如銀天淡青
角聲中有玉關情
早知送老桑麻野
悔失安西萬里行

湖隄

新月纖纖淡欲無
時聞魚躍隔菰蒲
籃輿小放潮隄上

信有人間白玉壺

秋旦

將旦溪風急新秋天宇寬涼生豎裁褐爽入縮縫冠拊
翼雞頻唱爭枝雀正譙一簞吾已足芋豆亦加餐

龜堂晨起

培火螭爐起寶熏滴泉鑿研聚玄雲屏圍燕几成山字
簞展涼軒作水紋絕口不談浮世事洗心聊策退居勲
老年猶健非無自一卷丹經受鄭君

柳橋秋夕

柳疎橋盡見水落路全通
衣杵家家月漁舟浦浦風
眼明無俗物步蹇有枯筇
野逸誰能那悠然西復東

道室雜題

早訪丹砂上岫嶠
晚提河派泝崑崙
陰符後出君無忽
三百奇文要細論

又

聞說湖中有釣舟
烟波出沒雜輕鷗
一聲清嘯去已遠

我欲從之何處求

又

山中有草名長生丹砂可死金可成服之刀圭齒髮換
要看東封告太平

又

勘書窻下松明火采藥溪頭槲葉衣只在人間人不識
秋風又見雁南飛

劔南詩豪卷四十六

欽定四庫全書薈要卷一萬五千五百三十七

集部

劔南詩藁卷四十七

宋 陸游 撰

儒生

儒生安義命所遇委之天用可重九鼎窮寧直一錢雖
云髮種種未害腹便便高卧茅簷下羹藜法不傳

秋夜

老病睡眠少如斯秋夜何長庚未配月織女已斜河莎

徑蟲吟苦柴門葉落多誰知窮甯戚不作飯牛歌

寺閣

三壑初得牧牛童兩扇新成釣舸篷偶訪野僧過射的
却衝微雨上樵風登山未減青鞵興到手俄驚綠酒空
自笑此身猶健在試憑重閣送飛鴻

秋暑夜興

寂寂空廊絡緯鳴消搖岸幘近南榮閒眠簟作波紋冷
新浴衣如蟬翼輕微雨已收雲盡散衆星俱隱月徐行

呼童持燭開藤紙一首清詩取次成

漁父

千錢買一舟百錢買兩漿朝看潮水落莫看潮水長持
魚換鹽酪縣郭時下上亦或得濁醪不復計瓶盎浩歌
忘遠近醉夢墮莽蒼玄真不可逢悠然寄遐想

省事

車馬聲都絕比鄰迹亦疎淺傾家釀酒細讀手鈔書薄
飯惟羹芋閒遊不借驢有時還自笑省事更誰如

新涼書懷

烏帽圍寬帶眼移，閉門慣忍日長饑。
文章雖愧聲名誤，志節寧隨血氣衰。
天地無私非困我，聖賢可學有餘師。
短檠正歎經時別，涼入郊墟喜可知。

又

藥物扶持病少蘇，殘年不恨老菰蘆。
潦收溪澗魚爭售，歲樂村場酒易沽。
無日榿林無墜葉，

榿木自夏至秋日有落葉不可勝掃

有時燕戶有新雛。

今年燕屢生雛七月望猶未止

秋風剽起扁舟興，安

得州家復鏡湖

又

鄰曲今年又有年
垂髫戴白各欣然
先輸官庾無逋賦
共賽神祠有社錢
退傳寄聲情縝密

連得周丞相書細字滿幅

晦翁

入夢語蟬聯

昨夕夢朱元晦甚欸

燈前細與兒曹說
蠹簡猶堪數

世傳

又

山川遺迹晉唐餘
水竹相望許洛居

朱希貞嘗言山陰富水竹有洛陽許

象下氣

一齒屢搖猶決肉雙眸雖澀尚耽書郊原夜夜驅
耕犢村店時時秣蹇驢客問若為娛老境吾兒未與短
檠疎

七月十七晚行湖塘雷雨大作

電火雷轟下九關我行莫出郊原間鬚髻暗樹類奇鬼
突兀黑雲如壞山江潮默應鰻岫溢鐵鑊自脫梅梁還
今夕虛簷瀉懸瀑預知高枕聽淙潺

七月十八夜枕上作

電掣光如晝雷轟意未平
亂雲俄卷盡孤月却徐行
露草蛩相語風枝鵲自驚
一涼吾事足美睡到窻明

梅市

梅市柯山小繫船開篷驚起醉中眠
橋橫風柳荒寒外月墮烟鐘縹緲邊
客思況經孤驛路詩情又入早秋天
如今老病知何恨判斷江山六十年

秋思

利欲驅人萬火牛江湖浪迹一沙鷗
日長似歲閒方覺

事大如山醉亦休
衣杵相望深巷月
井桐搖落故園秋
欲舒老眼無高處
安得元龍百尺樓

小舟湖中夜歸追和孟浩然夜歸鹿門歌

山光漸淡川氣昏
急雨亂打荷葉喧
小舟橫掠湖邊村
人家收網半閉門
吾廬未見見堤樹
舟人指點孤燈處
蒲叢姑惡最可哀
衝雨飛鳴背人去

酒盡

飲酒但飲濕
吾聞之老坡
渠非惜酒錢
無如久窮何
我

窮乃過之空壘倒餘濕日來彌可笑濕亦不可得平生
忍饑多得飯已有餘父子茅簷下清坐談詩書

燒香

寶熏清夜起氤氲寂寂中庭伴月痕小斲海沉非弄水
旋開山麝取當門蜜房割處春方半花露收時日未暝
安得故人同晤語一燈相對看雲屯

自述

寄懷魚鳥卧烟汀結友松筠醉草亭拜賜龜章紆舊紫

予蒙恩錫服篋中有守
郡時故袍用以拜命

養成鵠鬢掃餘青遺經在櫝傳

家學大字書牆作座銘浪迹江湖遂終老此身何啻一
浮萍

又

意望天公本自廉甘餐美睡偶容兼一生憂患如山重
此日安閒抵蜜甜拙宦雖無齊虜舌早歸亦免楚人鉗
但餘一味疎慵在儲藥千斤未易砭

風雨

風搖北斗柄欲折雨溢天河浪正生一盞昏燈北窗下
腐儒未輟讀書聲

白露前一日已如深秋有感

匹馬曾防玉塞秋豈知八十老漁舟非無丈二竿堪請
只恐傍人笑白頭

又

護塞寧須右北平拂雲祠是受降城誰知此志成虛語
白首燈前聽雁聲

東村晚歸

蜀道還吳鬢已絲歷年二紀固應衰寧知病思沉綿日
又見秋風搖落時錦雉白魚供野餉青林紅樹入新詩
東村寂寂風烟晚酒挂驢肩又一奇

秋望

快哉一雨洗浮塵却喜郊原霽色勻野火已亡秦相篆
江濤猶託伍胥神登臨頓覺清秋早流落空悲白髮新

東望思陵鬱葱裏老民猶及見時巡

游尚能記高
皇建炎巡幸

郭西

鵲下川原黑船行浦溆空橋燈搖水影樓角散天風野
眺飛埃外漁歌冷翠中不須嘲病翼要是脫樊籠

舍北

支徑秋原上衡門夕照中野烟山半失溪漲浦橫通鬢
禿難藏老衣穿可諱窮浩歌終自得心事寄冥鴻

夜坐示子聿

久客誠當去無心偶小留掃空閒夢想閱盡舊朋儔學

術非時好文章幸自由

蘇黃門贈侄孫元老詩有云從此文章始自由

不嫌秋

夜永問事有長頭

柳橋晚眺

小浦聞魚躍橫林待鶴歸閒雲不成雨故傍碧山飛

秋興

秋風吹我夜植杖溪橋側木葉雖未凋慘澹無顏色

又

功名不垂世富貴但堪傷底事杜陵老時時矜省郎

又

秋暑勢已窮風雨縱橫至白鷺立清灘與我俱得意

又

胸中萬卷書一字用不著歸休始太息竟是為農樂

又

酌酒桑陰下邠風入醉歌何須繩檢外名教樂還多

嘉泰辛酉八月四日雨後殊淒冷新雁已至夜復

風雨不止是歲八月一日白露



殘暑方炎忽痛摧無情風雨亦奇哉但嗟不為貧人計
未動秋砧雁已來

又

仲秋四日雁橫天閉戶垂帷意已便方歎今年時候早
夜深風雨更淒然

近村民舍小飲

秋風吹細雨蕭然濯炎熾老夫疾頓平甘食仍熟寐春
物財幾何搖落已復至昔人喻死生謂若屈伸臂愚公

顧不靈白首沒榮利嗟予幸學道了此直差易三拜散
人號退志獲早遂絃歌萬二千盡力不能崇瘦驢骨可
數渺渺入空翠霜蟹初把螯絲蓴小添豉平生笑巨君
老齧乾肉糲異味幸滿前萬事付一醉

閒適

飲酒不至狂對客不至疲讀書以自娛不强所不知一
窻袖手坐往往晝漏移初非能養生簡事頗似之四時
俱可喜最好新秋時柴門傍野水鄰叟閒相期

又

陸子居山陰杜門輒經年有時思出遊兩屨凌風烟長
鑱斲靈苗大瓢挹飛泉眼長不及寸能著萬里天不飲
顏常丹不食腹果然金丹六棄置我是地行仙

夜歸

今年寒到江鄉早未及中秋見雁飛八十老翁頑似鐵
三更風雨采菱歸

又

芡浦菱陂夜半時小舟更著疾風吹青熒一炬楓林外
鬼火漁燈兩不知

自咏

宦遊疇昔徧天涯萬里東歸歲月賒古道泥塗居士屨
荒畦烟雨故侯瓜園公谿父逢皆友野寺山郵到即家
病思漸輕重九近又將烏帽插黃花

老歎

一齒危將墮雙瞳久已昏謀生賴蔬圃養拙閉柴門多

病從來慣虛名不足論自憐餘一念猶欲濟元元

秋社

雨餘殘日照庭槐社鼓鼕鼕賽廟回又見神盤分肉至
不堪沙雁帶寒來書因忘作閒終日酒為治聾醉一杯
記取鏡湖無限景蘋花零落蓼花開

晨起

雞已參差唱窻纔曉聰明高林風不止叢竹露如傾夢
為多難記詩緣嬾少成晨興了無事散髮遶階行

中夜睡覺兩目每有光如初日歷歷照物晁文元
公自謂養生之驗予則偶然耳感而有作

人情所願欲莫若貴與富是皆有命焉非力可成就予
昔未有聞無與發其覆趨趨强干祿時命適大謬方行
蛇當道未至燠已噤適燕乃南轅之楚顧北首風波起
平地兩耳厭嘲詬隴蜀萬里餘數遍道傍埃六十歸為
郎數月草章奏夫豈或使之擊去惟恐後嗟彼亦何心
喜愠出邂逅還山惟自訟衡茅屏幽陋乘除得少健上

下歷巖岫得飽豈復擇百口同飯糗寒龜久猶息野鶴
老益瘦又如已放馬寧當夢華廐造物念途窮畀以樗櫟
壽雖無熊鳥術坐空陰陽寇兩皆若有光夜視如正晝
物生稟定數此語聞自舊置冰鳥覆翼棄野於菟穀偶
然當後死鬼錄自遺漏山陂粟屢收池水麻可漚鄰父
相歡娛席地醉醇酎

錢道人不飲酒食肉囊中不畜一錢所須飯及草
屨二物皆臨時乞錢買之非此雖強與不取也

萬里飄如不繫船
空囊短褐過年年
食時無飯芒屨破
只向街頭旋乞錢

又

誤辱君王賜鏡湖
身隨鷗鷺寄菰蒲
行年八十猶強健
欲伴先生去得無

枕上

呼兒初夜上門關
怕冷貪眠自笑孱
月色橫分窻一半
秋聲正在樹中間
莫年不復樽前樂
浮世無如枕上閒

鍊句未安姑棄置明朝追記尚斑斑

山園書觸目

山近雲生易人稀鳥下頻瘦篴穿石竅古蔓絡松身熟
摘巖邊果乾收澗底薪經過不相識喚作避秦人

苦貧戲作

五窮作祟不容支蟬腹龜腸旋過時客散難求門外轍
衣穿徒有鬢邊絲兒能解事甘藜藿婢苦無薪睨庖房
箕踞浩歌君會否書癡終覺勝錢癡

秋曉書感

天公息我半生勞，寄傲江湖亦足豪。
淡盡月痕知夜艾，飄殘桐葉喜秋高。
讀書時亦挂牛角，對酒正須持蟹螯。
縱有故人終自絕，安能從汝望緇袍。

秋夜

抱病齒髮非閱世，城市換朋儕。
冢累累在者，亦雲散窮居。
嬾出戶，俯仰秋已半。
疎鐘到倦枕，微火耿幽幔。
平生疑著處，忽若河冰泮。
百年寓逆旅，萬事真旣灌。
紛紛彼方

窺袖手不須喚蘿月忽滿窻悠然付長歎

村舍

篠屋楓林下

山中人以篠覆舍厚密過于茅

柴門茨浦旁先鳴雞膺膊

徐上日蒼涼服藥貧寧輟觀書老有常仍須教童稚世
世力耕桑

又

生理嗟彌薄吾居久未完蝶飛窻紙碎邇圻壁泥乾小
雨牛欄濕微霜碓舍寒晚禾蟲獨少鄰里共相寬

今年晚禾

苦蟲蛀子
鄉獨免

天涼時往來湖山間有作

萬壑千巖自古傳青鞵布襪更誰先
泛舟菰脆鱸肥地
把酒橙黃橘綠天
秦篆舊碑荒草棘
禹書遺穴慘風烟
誰知陸子登臨日
已近浮生八十年

雨夜歎

秋雨何曾住一滴
老夫危坐欲三更
開元貞觀事誰問
溫洛滎河塵未清
豐年猶有餓死慮
破屋自愛讀書聲

刺經作制豈不美無奈人間痛哭生

病足晝卧夢中譫諄乃誦尚書也既覺口占絕句
唐虞已遠三千歲每誦遺書涕泗潛濟濟九官十二牧
我獨不得居其間

又

人能不食十二日

趙岐柳開皆嘗不食十二日不死

惟書安可一日無

唐虞雖遠典謨在病卧蓬窻時囁嚅

新買啼雞

我我赤幘聲甚雄意氣不與其曹同我求長鳴久未獲
一見便覺千羣空主人燒神議已決知我此意遽見從
秋衣初縫惜不得急典三百新青銅憐渠亦復解人意
來宿庭樹不待籠狐狸熟睨那敢犯蕭蕭清露和微風
五更引吭震戶牖橫挺無復須元戎明星已高啼未已
雲際騰上朝陽紅老夫抱病氣已索賴汝豪壯生胸中
明朝春黍得碎粒第一當冊司晨功

幽棲

幽棲少人客積病得衰殘身納分司祿兒須遠次官新
寒換衣典閒日借書觀更歎秋來瘦晨興覺帽寬

又

自卜幽棲地頻驚歲月移鄉鄰崇禮讓子弟習書詩喔
喔雞鳴樹狔狔犬吠籬謀生已過足富貴亦何為

秋日雜詠

都門初出若登仙弄水穿雲喜欲顛只恐光陰已無幾
不知又過十三年

又

五百年前賀季真
再來依舊作閒人
一生看盡佳風月
不負湖山不負身

又

菰蒲風起莫蕭蕭
烟歛林疎見斷橋
白蟹鯿魚初上市
輕舟無數去乘潮

又

葉底珍禽不受呼
弄風小蝶點殘蕪
舍南舍北秋光好

到處皆成一畫圖

又

紅莧如丹照眼明
卧開石竹亂縱橫
騷人見處終然別
只說清秋采落英

又

桐葉吹殘柳亦稀
溪頭倚杖立斜暉
誰知老子無窮喜
待得吾兒小艇歸

又

久雨初晴喜欲迷
青鞵踏徧舍東西
忽然來到柳橋下
露濕蓼花紅一溪

又

十里秋風畫角哀
夕陽光景亦佳哉
正疑白鷺歸何晚
一片雪從天際來

望永阜陵

龍飛回首尚如新
忽閱人間四十春
聖主已嚴天上駕
孤臣歸作道傍民
傾河尚恨難供淚
衛社何由得致身

獨立秋風吹白髮感恩肝膽漫輪囷

排悶

悠然不覺歲時遷楚水楓林繫釣船
貧悴只如行卷日
衰遲忽過挂冠年
閒遊野寺騎驢去
倦擁殘書聽雨眠
賴有一籌差自慰
小兒筆墨日翩翩

秋日晨起

翻樹鴉知旦橫空雁戒寒
但欣蘇肺渴未暇議衣單
粥鼎湯初沸香篝火半殘
讀書心漸嬾顧影一長歎

出遊莫歸戲作

終年兀兀復騰騰眼看朱門幾廢興造物偶容窮不死
衆人共養老無能逢山自有閒遊侶入寺寧無淡話僧
莫道歸來却岑寂小兒同守短檠燈

自詒

荒圃風烟入荷鉏孤村巷陌看騎驢少年曾縱千場醉
老境惟存一束書作意買山雖已矣忍慙乞米獨何歟
所欣肺病秋來減白髮蕭蕭可自梳

予出蜀日嘗遣僧則華乞籤于射洪陸使君祠使
君以老杜詩為籤予得遣興詩五首中第二首其
言教戒甚至退休暇日因用韻賦五首

我幼入家塾結髮知苦心稍長謬聞道篤守至于今淡
然朱絲絃三歎有遺音詎敢負所學枉尺求直尋彼哉
孔光輩千載汚儒林

又

童子丹元家湛然居靈府世人不少悟役役徒自苦江

湖豈不廣魚乃投數罟是身如璞玉要經大火聚萬卷
讀丹經孰能精去取

又

少壯不自料慷慨志四方謝病還故山姑覺白日長命
薄類蟬翼功名安可望狐狸不足間力不當豺狼惟有
卧釣船仰看白鷺行

又

孤雲起江郊萬木酣天風水鳥何所恨終夜號孤叢我

興視中庭北斗挂寒空誰言秋夜長明星已生東丈夫
老憂國百慮蟠胸中

又

我昔遊青城萬仞窮躋攀巢居上官翁許我分半山且
言牡丹平可卜茅三間報國未能忘承詔遂東還蹭蹬
意何成看雲徒汗顏

悲歌行

有口但可讀離騷有手但可持蟹螯人生墮地各有命

窮達禍福隨所遭嗟予一世蹈謗藪
如八月秋江濤尊拳纔奮肋已碎
曹射箭盡弓未弣形骸骨悴吹可倒
摧拉未足稱雄豪一身百憂偶得活
殘年幸許歸蓬蒿時時照水輒自笑
霜顱雪頷不可薶脫身任路棄衫笏
如病癰疥逢爬搔見事苦遲已莫悔
監戒尚可貽兒曹勉騎欵段乘下澤
州縣豈必真徒勞

秋夜讀書

門前客三千帳下兵十萬人生可意事
隨手風雨散不

如一編書相伴過昏旦豈惟洗貧病亦足捍患難老夫
垂八十巖電尚爛爛孤燈對細字堅坐常夜半吾兒幸
能繼書亦未殘斷安知不遭時清廟薦玉瓚不然老空
山亦足化里閑我死斯言存觀者有追歎

對食戲詠

一飽欣逢歲小穰時憑野餉誑枯腸橙黃出白金壺美
菰脆供盤玉片香客送輪囷霜後蠨僧分磊落社前薑
秋來幸是身強健聊為佳時舉一觴

懷昔

偶住人間日月長
細思方覺少年狂
衆中論事歸多悔
醉後題詩醒已忘
鼉作鯨吞吁莫測
谷堙山塹浩難量
老來境界全非昨
卧看縈簾一縷香

偶得雙鯽

今朝溪女留鮮鯽
灑掃茅簷旋置樽
養老不須煩祝鯁
從來楚俗慣魚飧

又

酒興森然不可回重陽未到菊先開一雙鱗刺明吾眼
催喚厨人斫鱸來

秋懷十首以竹藥閑深院琴樽開小軒為韻

我非王子猷賦性亦愛竹舍外地十畝不蕝凡草木長
吟雜清嘯觸目皆此族更招竹林人枕藉糟與麴

又

短裘入重雲長鏡求靈藥人後四體具狗杞羣吠惡采
實去條枚摘花棄跗萼長嘯忽躡空天台赴幽約

又

惟王居法宮玉帛來四裔一朝啓戎心邊城或晝閉養生能體此皆可閱千歲利欲喜乘人日夜勤自勵

又

飲酒可不病自酌隨淺深處世可無患惟勿欺此心此心實通天一念天所臨子能守吾言可度豺虎林

又

吾道久寂寞不絕如一綫至人隱市塵我輩何由見安

得世外士與之共談讌僧話亦或佳聊可過竹院

又

小人方盛時瓦礫視黃金及其大勢去或不遺一簪鄙
塢今尚存遺戒豈不深所以栗里翁惟蓄一素琴

又

世事本何常賀弔更在門棄為溝中斷亦何羨犧樽禍
福要其終愚智始可言君看驪山墓何若揚王孫

又

今日天微寒處處菊花開永懷杜拾遺抱病起登臺古
路逢僧過濕雲聞雁來我亦秋風客詩成有餘哀

又

天鏡環千峰蒼翠立雲表漁舟破浪來泛泛一葉小雲
門若耶間迨此素秋杪登覽不可遲去若孤鴻矯

又

丈夫素所學致主齊義軒恨無同志人徒欲起九原痛
哭驚世俗著書成空言歲月去衮衮吾其死空村

示客

枳縛藩籬荆作門蕭條何以致諸君
歸休正得求吾志
老病猶能誦所聞紫蟹迎霜徑盈尺
白魚脫水重兼斤
一杯湫澱無辭醉秋稼登場合策勲

秋晚村舍雜詠

村巷翳桑麻蕭然野老家園丁種冬菜
隣女賣秋茶啄
木舂竒服牽牛蔓碧花一樽雖草草笑語且喧譁

又

秋晚年中熟湖鄉未寂寥步頭橫畫舫柳外出朱橋潮
壯知多蟬霜遲不損麴家家新釀美隣里遞相邀

卧病累日羸甚偶復小健戲作

病忽迨旬日衰如增十年難求秦緩藥空負宋清錢微
火秋先跨閒房晝亦眠偶賒書鬼錄遇酒又陶然

又


伏枕瀕九死下牀如再生幸回蒿里駕猶作越吟聲拂
几嗟塵積開書覺眼明淖糜方自養未敢憶南烹

又

行年當大耋卧病涉高秋
丸藥作奇驗傲裝仍小留
輕漚元泛泛破屋已颼颼
尚有江湖興沙頭問釣舟



劔南詩豪卷四十七



總校官庶吉士臣張能照

校對官庶吉士臣翟槐

謄錄貢生臣王嘉稷

欽定四庫全書薈要

集部

劔南詩豪卷四十八

九

詳校官助教臣謝登雋



欽定四庫全書薈要卷一萬五千五百三十八

集部

劔南詩豪卷四十八

宋 陸游 撰

縱筆

莫笑畸翁迫耄期從來不許俗人知
繫船慣聽巴東雨畫策曾從渭北師
袖劔客同樓上醉爛柯人看洞中棋
如今更欲滄溟去鯨浪浮天信所之

又

常笑相如賦上林肯為子政鑄黃金心光自發誰能障
踵息無聲不厭深搖齒復牢堪決肉枯顙再茁已勝簪
老松澗底雖終棄霜雪元知不解侵

又

拖得烏藤到處行看山看水眼猶明但期少健遊潼華
豈必長生似老彭一緬青鞵吾事了半甌綠酒萬緣輕
安知不作希夷叟生長兵間老太平

予生于宣和未遇
虜禍間關東歸又

避地
數年

又

未說無功爵位叨昔人所畏在功高印如斗大寧常保
劒拄頤長祇自勞酒社極知身可隱獵場猶得氣差豪
世間見透渾無事狐貉安能詫緼袍

村興

折花持博酒種菜賣供家請藥人何壅爭棋客正譁漁
翁足蹠蹕牧豎手丫叉短景匆匆晚橫林又宿鷗

賽神

歲熟鄉鄰樂辰良祭賽多荒園拋鬼飯高杙置神鵝

村人

謂祭神之牲
曰神猪神鵝

人散叢祠寂巫歸醉臉酡饑鴉更堪笑鳴

噪下庭柯

小立

紅樹園廬晚碧花籬落秋荒陂船護鴨斷岸笛呼牛酒
賤村村醉山寒寺寺幽聊須岸烏幘小立埭西頭

窮老

窮老寧須歎吾生得已多風埃棄朝幘烟雨弄漁蓑富

屋烏爰止閒門爵可羅人生只此是得酒且高歌

晚步舍東

籬槿花開柿葉丹土溝東去過牛欄草烟漠漠天將暮
布褐蕭蕭客正寒

述野人語

白米乾薪好井泉甘餐美睡若登仙從來不慣嘗鹽酪
席下何須有一錢

又

重重大布敵風霜
籬外桑陰五月涼
軟飯一盂千萬足
那知世有郭汾陽

戲畬野人

日飲雲根一脉泉
知君骨相自應仙
曲肱閒卧茅簷下
買斷南山不用錢

又

木葉凋疎天欲霜
老懷多感易淒涼
得君數語開人意

徑就湖橋醉夕陽

湖橋有村
店酒甚美

建安陳希周官海南為予致兩拄杖其一促節竹
其一枕榔也

雨漬嵐侵蘚暈重石砮楷矢正相同取從萬里鯨波路
來伴三山鶴髮翁雪一作雲上有時留醉草花前隨處打
殘紅化龍徑去吾何憾且與人間作歲豐

排悶

棄官謂逍遙勞苦殊未既荒疇須墾闢破屋欠塗墍疾
深藥難求食盡穀暴貴安能作經營但覺睡有味秋高

霜露逼更苦薪炭費雖云未遽死饑凍亦可畏頗思從
李廣小獵聊吐氣復恐灞亭歸邂逅逢醉尉

九月十二日折菊

黃菊芬芳絕世奇重陽錯把配萸枝開遲愈見凌霜搯
堪笑兒童道過時

表姪江垆種竹名筠坡來求詩

奉常遺緒冷如秋閉戶知君頗好修千里可嗟妨晤語
兩書猶喜免沉浮但令有竹能醫俗何患無天可寄愁

一事却須常自勉勿容兒子得同遊

微雨

晡後氣殊濁黃昏月尚明忽吹微雨過便覺小寒生樹
杪雀初定草根蟲已鳴呼童取半臂吾欲傍堦行

秋晚寓歎

荷葉枯已盡菊花殘更香帶醒嘗野橘和夢聽啼蜚鬢
畔流年速燈前舊話長寒龜且未死不必恨搢牀

又

野處仍多病，經年無與遊。僧庸幾市井，醫傲過公侯。不
睡愁逢夜，無衣怯到秋。一端聊自慰，問事有長頭。

又

幽夢雞呼覺，孤愁雨滴成。天高那可問，年往若為情。孱
種猶遺育，神州未削平。登高西北望，衰涕對誰傾。

又

老歎交朋盡，閒知日月長。著書終覆瓿，得句漫投囊。霜
樹昏鴉黑，風簾小蝶黃。村醪如水薄，也復畱年光。

又

十里丹楓岸三家小麥村山多妨極目秋晚易消魂火
舉船過埭人行犬吠門窮愁已如許那更雨昏昏

又

行年垂大耋久矣少朋儔舊事同誰說新詩或自誚廢
書眠過日泥酒醉經秋遲速皆當死時來莫預愁

秋晚湖上

已過西成賽廟期家家下麥不容遲夕陽遍野人歸後

秋水生灘鷺集時靈藥不治懷抱惡好詩空益鬢毛衰
從來未識蘇司業愁絕西風滿酒旗

縱遊歸泊湖橋有作

西蜀東吳到處遊千巖萬壑獨吾州短篷載月娥江夜
小蹇尋詩禹寺秋村酒可賒常痛飲野人有興即相求
何由喚得王摩詰為畫湖橋一片愁

九月十八日至山園是日頗有春意

烏藤真好友伴我出荆扉落葉紛如積鳴禽暖不歸露

濃松鬣長土潤朮苗肥未盡幽尋興還家趁夕暉

明日又來天微陰再賦

烏白赤于楓園林九月中天寒山慘淡雲薄日曛曠旋
摘分猿果寬編養鶴籠身閒足幽事歸卧莫匆匆

又

河岸風檣遠村陂牧笛長短籬園鹿眼幽徑繚羊腸照
水鬚眉見搓橙指爪香衣裘又關念礎杵滿斜陽

雨後至近村

夜雨曉方止朝雲猶作陰山餘一寸碧溪長半篙深卧
泛白鷗渚行穿黃葉林老農能共語真率會人心

又

年耄身猶健秋高疾已平隣翁思問訊荒圃要巡行竹
杖輕無迹芒鞋捷有聲相逢無別語努力事冬耕

雨復作自近村歸

夜聽蕭蕭未漲溪朝行漈漈已成泥可憐鳩取招麾速
誰似雲知出處齊野菊枝長半狼藉江楓葉落正淒迷

行人也識龜堂老小榼村醪手自攜

雨寒戲作

掃園收槲葉培地甃塼爐幸有藜烹粥何慙紙作襦

衡門晚眺

幽居端似玉川生茅屋支撐不更營青旆荒寒增酒興
錦囊零落負詩情殘蕪色襯斜陽遠落葉飛如野鳥輕
徂歲崢嶸忽如許雁來又過會稽城

不寐

麗譙聽盡短長更幽夢無端故不成寒雨似從心上滴
孤燈偏向枕邊明讀書有味身忘老報國無期涕每傾
敢為衰殘便虛死誓先鄰曲事春耕

示子虞

好學承家夙所奇蠹編殘簡共娛嬉一婚倘畢吾無累

吾今年為一子自蜀歸者聘婦無復婚嫁之責

三釜雖微汝有期

子虞明秋當赴句金

聿

弟元知是難弟德兒稍長豈常兒要令舟過三山者弦

誦常聞夜艾時

弊廬

弊廬雖陋甚鄙性頗所宜歌傾十許間草覆實半之確
聲隔柴門績火出枳籬縛木為彘牢附垣作雞埭黃犢
放林莽蒼鵝戲陂池傭耕食于我客主同爨炊瓦盎設
大杓藟莧羹園葵一飽荷鋤出作勞非所辭上以奉租
賦下以及我私有錢即沽酒阡陌恣遊嬉亦有扶持者
婢跣奴髻椎欲畫恨無人後世考此詩

予未冠即交諸名勝今無復在者感歎有作

早歲鄉間接勝流老來零落歎山丘
欲尋共語人難得却是封侯印易求
數酌不能成兀兀一枰且復寄悠悠
世間只有身差重惆悵今年白盡頭

夜雨

吾詩滿篋笥最多夜雨篇四時雨皆佳
莫若初寒天紙帳白于氈紙被軟于綿
枕傍小銅匱海沉起微烟是時聞夜雨
如絲竹管弦恨我未免俗吟諷勤雕鐫
南朝空堦語妙出建安前意謂奪造化
百世莫比肩安知梧桐

句乃復與竝傳夜雨何時無寄語付後賢

題嚴州王秀才山水枕屏

我行天下路幾何三巴小益山最多翠崖青嶂高嵯峨
紅棧如帶縈巖阿下有駭浪千盤渦一跌性命委蛟鼉
日馳三百一烏騾雪壓披氊泥滿鞢驛亭沃酒醉臉酡
長笛腰鼓雜巴歌大散關上方橫戈豈料世變如翻波
東歸輕舟下江沱回首歲月悲蹉跎壯君落筆寫岷嶠
意匠自到非身過偉哉千仞天相摩谷裏人家藏綠蘿

使我恍然越關河熟視粉墨頻摩挲

小飲示座中

鏡裏蕭蕭兩鬢衰閒人正與老相宜誰知剪燭焚香夜
恰是搓橙破橘時莫道閉門無逸氣尚能為客誦新詩
君看江海寬多少是處皆堪理釣絲

搖落吟

素秋欲盡風雨惡千林如掃俱搖落年運而往秋復冬
念念元知已非昨癡人顧欲吝此生放翁憫汝笑絕纓

髮毛爪齒俱外物天地大化終無情我貧無以遺兒子
惟有一言持付爾仕宦要能當百挫為農餓死無游惰
插花

有花君不插有酒君不持時來花枝空人老酒戶衰今
年病止酒虛負菊花時早梅行可探家醞綠滿卮君不
強一醉歲月復推移新詩亦當賦勿訝字傾欹

雨過行視舍北菜圃因望北村久之

蔬畦躡屐愜幽情檢校園丁日有程得雨尚慳須灌溉

我來時聽桔槔聲

又

吳牛齧草卧斜陽
烏柏青紅未飽霜
急趁路乾來寓目
十分閒事却成忙

居三山時方四十餘
今三十六年久已謝事而連
歲小稔喜甚有作

自問湖邊舍
衰殘俛仰中
謀身悲日拙
造物假年豐
稅足催科靜
禾登債負空
社醅邀里巷
膳肉飫兒童
衣及

霜晨贖爐先雪夜紅陂塘趨版築垣屋訖宮功盜息時
雍象人淳太古風退夫無一事鼓缶伴鄰翁

幽居

百事徒勞無一成幽居偶得稱幽情傍籬叢枳寒猶綠
遶舍流泉夜有聲饑坐炮燔多巨粟醉歸懷袖有新橙
愛閒自是從來癖敢竊區區納祿名

予自儀曹罷歸十年不出戶乃請挂

冠

曉晴肩輿至湖上

多稼如雲獲併空牛闌樵檐畫圖中梧桐已逐晨霜盡
烏白猶爭夕照紅脫網唵喁犇遠浦避鷹撲握保深叢
旗亭人語燈初上一醉何妨野老同

戲作野興

省事貧猶富寬懷客勝家充虛一簞飯遣睡半甌茶有
興閒垂釣逢歡醉插花皋橋亦可死處處是生涯

又

擾擾亭中客悠悠局上棋所遭元有命自苦竟何為馮

衍深尤婦陶潛過責兒奇文雖可貴寢語豈非癡

又

久已挂吾冠江邊歲又殘心惟無媿怍身取不饑寒小
酌三杯足安居一席寬東岡有泉脉攜杖試尋看

又

今年病微減耕稼樂江村燈火耿破屋歌呼圍老盆常
時但葵菹盛饌有雞豚客散茅簷寂蹒跚自閉門

又

出戶語鄰叟與卿同一愚逢人即如舊臨事不勝迂髮
白花猶挿囊空酒亦沽回思五十載何處有榮枯

又

有酒皆堪醉無山不可廬遂初成近賦孤憤悔前書湘
寺分經帙廬山寄藥鉏江頭霜葉滿詩興屬騎驢

道室書事

榻上一琴橫中函太古聲丹砂燒已死芝草種初生道
勝魔軍破方靈疾豎平明朝有蜀使細字報青城

行飯至潮桑堰東小市

飽食無營是處遊偶然來到埭東頭芒鞋也似雙鳬快
漁艇真如一葉浮樵擔行歌衝暝色酒旗遮路賣新筍
任朱二老今安在歎息黃茅擁故丘

任朱皆居堰旁與予同乙巳生今死

矣

負日戲作

困來兩背似膠黏底怪吳人號黑甜安得他生不識字

朝朝就日卧茅簷

世傳楊大年見老兵負日不覺曰快活曰問汝識字否對曰不識大年曰

如此更
快活也

遊西村

昨夜雨多溪水渾不妨喚渡到西村出遊始覺此身健
無食更知吾道尊藥笈可賒山店酒筇枝時打野僧門
歸來燈火茅簷夜且復狂歌鼓盞盆

初冬

平生詩句領流光絕愛初冬萬瓦霜楓葉欲殘看愈好
梅花未動意先香暮年自適何妨退短景無營亦自長

況有小兒同此趣一窗相對弄朱黃

遣懷

寬袂新裁大布裘低蓬初買小漁舟
舊交只有青山在壯志皆因白髮休
漫道臥羅吞貉子安能浙米向矛頭
山園芋栗秋方熟一飽今知本易謀

策杖

山翁老病入腰臀坐覺諸兒行步犇
暫出衡門須策杖千回上樹更堪論

汲東山下井

從來耽酒須微祿
絕祿三年酒盞疎
百尺轆轤新浚井
一杯聊慰渴相如

園中作

誰采枕榔寄一枝
北來萬里為扶衰
風光最愛初寒候
懷抱殊勝未老時
閒引微泉成曲澗
盡除枯蔓補疎籬
花前自笑童心在
更伴羣兒竹馬嬉

又

病侵衰境頻須藥日漏寒雲旋作晴幽鳥喚回殘枕夢
蠻童扶下野堂行書生本自安窮處豐歲何妨樂太平
新買西村兩黃犢閒招鄰曲議春耕

園中

霜凋櫟柳枝無葉風折安榴子滿房冬日園林元自好
老人懷抱自多傷

短篷

射的山前繫短篷快如魚鳥出池籠試臨清鏡枯顱茁

不待丹砂兩頰紅
逐妄青年真自苦
造微一日有餘功
不須更說岷峨約
已覺蓬壺在眼中

自適

遠遊思里巷
久困念耕桑
家釀傾醅碧
園蔬摘矮黃

小槽

用策豆麴矮黃吳中菜名
利名因醉遠
日月為閒長
今歲雖中熟
吾

徒亦小康

堂東小室深丈衮半之戲作

小室舍東偏
滿窗朝日妍
研池生細浪
香岫起微烟
欲

極圖書樂少須冰雪天猶勝禪榻上僅僅占三椽

禪僧自謂

三條椽下
六尺單前

獨處

蓬門終日閉寂寂少人聲納祿知身貴傳家覺責輕朝
餐烹芋糲夜坐藝松明剗却彈棋局此心如砥平

又

白氈敷牀穩烏藤倚壁斜灰深惟畫字燈暗不成花似
客猶居里如僧未出家孤村夜無月何事有啼鴉

讀史

青燈耿耿夜沉沉掩卷淒然感獨深
恤緯不遑發婦歎美芹欲獻野人心
孤忠要有天知我萬事當思後視今
君看宣王何似主一篇庭燎未忘箴

漁翁

船入蘆花日暮時雙瞳炯炯鬢如絲
世間豈少磻溪叟老向烟波人不知

又

文叔君房兩故人可憐俱作白頭新
桐江歸伴隣翁醉一笑相看意却真

寓言

濟劇人才易扶顛力量難為謀須遠
大守節要堅完氣與秋天杳胸吞夢
澤寬方知至危地自有泰山安

又

出仕謝招麾還家美蒨薇深居全素
志大路息危機世變生呼吸人情忽
細微牀頭周易在捨此欲安歸

又

山海三家市風烟五畝園藜羹均玉食茅屋陋朱門耕
釣此身老乾坤吾道尊故交淪落盡至理與誰論

夜四鼓睡覺起行簷間觀新作南籬

星斗闌干天宇清起披短褐繞廊行葉聲颯颯飛霜重
籬影踈踈落月明沙冷斷鴻投別浦風高殘漏下孤城
衰遲自笑情猶在一首新詩取次成

客去追記坐間所言

征西幙罷幾經春
歎息兒音尚帶秦
每為後生談舊事
始知老子是陳人
建隆乾德開王業
溫洛滎河壓戰塵
倘得此生重少壯
臨危敢愛不貲身

疇昔

行路悲疇昔
驅車每戴星
數殘雙隻堠
歷盡短長亭
飛蓋交迎餞
聽歌半醉醒
至今湖海夜
猶夢隴山青

飲牛歌

門外一溪清
見底老翁牽牛飲
溪水溪清喜不污
牛腹

豈畏踐霜寒墮趾舍東土瘦多瓦礫父子勤勞菽黍稷
勿言牛老行苦遲我今八十耕猶力牛能生犢我有孫
世世相從老故園人生得飽萬事足捨牛相齊何足言

牧羊歌

牧羊忌太早太早羊輒傷一羊病尚可舉羣無全羊日
高露晞原草綠羊散如雲滿川谷小童但搯竹一枝豈
必習詩知考牧

生日子聿作五字詩十首為壽追懷先親泣然有

作

十月十七日

我生尚及宣和末
頌歷頻驚歲月移
負米養親無復日
蓼莪廢講豈勝悲
渡江百口今誰在
抱恨終身祇自知
文字虛名何足道
樽前媿汝十章詩

園中書觸目

氣候今年晚
濃霜始此回
殘梧未全槁
晚菊有初開
烏柏先楓赤
寒鴉後雁來
西窗夕陽晚
摘橘薦新醅

烏柏未霜

而葉丹寒鴉
必得霜乃至

養生

武丁命傳說治國如和羹天亦命放翁用此以養生抑
過補不足輔相其適平千歲汝自有不必師廣成

齋中雜興

八十頽齡安所歸蕭然終日掩柴扉清心始信幽棲樂
窮理方知俗學非山果滿筐猿食足石泉通竈藥苗肥
衰翁莫道渾無事掃葉歸來又落暉

又

倒掩衡門手自關老身著在亂書間有詩尚作清宵崇
無事能妨白日閒薄莫上樓聊試步經旬止酒自醺顏
兒曹莫笑衰翁嬾擬遍淮南大小山

江上

禹會橋頭江渺然隔江村店起孤烟冷雲垂野雪方作
斷雁叫羣人未眠萬里漂流歸故國一生蹭蹬付蒼天
莫年尚欲師周孔未遽長齋繡佛前

追憶征西幙中舊事

大散關頭北望秦自期談笑掃邊塵收身死向農桑社
何止明明兩世人

又

小獵南山雪未消繡旗斜卷玉驄驕不如意事常千萬
空想先鋒宿渭橋

又

憶昨王師戍隴回遺民日夜望行臺不論夾道壺漿滿
洛筍河魴次第來

在南鄭時關中將吏有獻此二物者

又

關輔遺民意可傷
蠟封三寸綃書黃
亦知彼法如秦酷
列聖恩深不忍忘

關中將校密報事宜
皆以蠟書至宣司

冬夜

颼颼黃葉欲辭枝
况著霜風抵死吹
投老難逢身健日
讀書偏愛夜長時
孤村月白聞衣杵
破竈烟青煮芋糜
不是用心希陋巷
為儒自合耐寒饑

冬日

室中恰受一蒲團也抵三千世界寬上策莫如扁戶坐
苦閒猶復取書看蔬青飯軟枝梧老窻白爐新準備寒
堪笑此翁幽獨慣却嫌兒女話團圞

冬朝

風入園林徹夜鳴曉看黃葉與堦平篝爐火著衣初暖
爨釜薪乾粥已成潔已工夫先盥頰正心事業始冠纓

聖賢雖遠詩書在殊勝隣翁擊磬聲

釋氏謂銅
鉢為磬

冬莫

曉角昏鐘為底忙
豈容老子更禁當
乘除富貴惟身健
補貼光陰有夜長
臨水小軒初見月
滿庭殘葉不禁霜
巴江尺素何時到
刺著新詩寄斷腸

張梓州書
久不至

風月

鏡中日日鬢毛衰
八十還思七十時
風月不知人意緒
酒醒夢斷又催詩

落葉

萬瓦清霜伴月明
卧聽殘漏若為情
無端木葉蕭蕭下

更與愁人作雨聲

邠風

少學詩三百邠風最力行
春前耕犢健節近祭猪鳴簷
日桑榆暖園蔬風露清
金丹不須問持此畢吾生

擁爐不出輒終日自嘲

柴門木落葉成堆
十日元無一再開
書坐藏多為飽崇
詩緣吟苦作窮媒
兒言山圃當收粟
僧約溪橋共探梅
堪笑此翁推不動
地爐無火畫寒灰

探梅至東村

乞得殘骸已累年
柴車破弊不堪懸
閒愁正要供詩思
小疾何妨省酒錢
忍事漸多心混混
貯書雖少腹便便
今朝偶有尋梅興
春色爭來拄杖前

劔南詩豪卷四十八